

4. gr.

Gjaldskrá þessi, sem samin er og samþykkt af bæjarstjórn Húsavíkur skv. 22. gr. laga nr. 81/1988, um hollustuhætti og heilbrigðiseftirlit, staðfestist hér með, með ofangreindum gildistíma.

Heilbrigðis- og tryggingamálaráðuneytið, 21. nóvember 1991.

Sighvatur Björgvinsson.

Ingimar Sigurðsson.

SAMÞYKKT

um hundahald á Húsavík.

1. gr.

Hundahald í Húsavíkurkaupstað sætir þeim takmörkunum sem getið er um í samþykkt þessari.

2. gr.

Hundahald er háð leyfi bæjarstjórnar sem getur veitt lögráða einstaklingum, búsettum í kaupstaðnum, leyfi til hundahalds að uppfylltum eftirfarandi skilyrðum:

- a) Leyfið er bundið við nafn og heimili lögráða einstaklings og er óheimilt að framselja það.
- b) Hundurinn skal skráður á skrifstofu heilbrigðiseftirlits Norðurlands eystra, og þar fær eigandi hundsins afhenta merkta plötu, sem hundurinn skal ávallt bera um hálsinn.
- c) Árlega skal bæjarsjóði greitt gjald fyrir þá hunda, sem leyfi er veitt fyrir samkvæmt sérstakri gjaldskrá sem heilbrigðismálaráðherra staðfestir. Við ákvörðun gjaldsins, árlega, skal taka mið af kostnaði við framkvæmd samþykktar þessarar. Gjaldið skal greitt í fyrsta sinn við skráningu hundsins og síðan árlega fyrirfram með gjalddaga 1. maí. Hafi gjaldið eigi verið greitt innan tveggja mánaða frá gjalddaga fellur leyfið úr gildi.
- d) Skyld er hundaeiganda að hafa hund sinn ábyrgðartryggðan hjá viðurkenndu tryggingarfélagi. Við greiðslu árgjalds skal leggja fram kvittun frá tryggingarfélaginu er sýni að tryggingin sé í fullu gildi.
- e) Hundurinn skal aldrei ganga laus á almannafæri, heldur vera í taumi í fylgd aðila, sem hefur fullt vald yfir honum. Eigi er leyfilegt að fara með hunda í matvöruverslanir eða aðra staði þar sem matvæli eru höfð um hönd. Sama gildir um aðrar verslanir í kaupstaðnum. Bannað er að fara með hunda inn í sjúkra- og skólahús og dagvistar- og dvalarheimili hvers konar, leikhús, félagsheimili, kvikmyndahús, sundlaug og önnur íþróttahús, hótél og gististaði. Bannað er að fara með hund inn á skipulögð leiksvæði barna.
- f) Hundaeigandi skal gæta þess vel að hundur hans valdi ekki hættu, óþægindum eða óþrifnaði. Eiganda er skyld að fjarlægja saur eftir hundinn.
- g) Ef sótt er um leyfi til að halda hund í fjölbýlishúsi, skal skriflegt samþykki allra íbúðareigenda í sama stigagangi fylgja umsókn. Sé um að ræða raðhús eða parhús skal samþykki aðliggjandi íbúða (íbúðar) fylgja umsókn. Í fjölbýlishúsi þar sem sérinngangur fylgir íbúðum, þarf samþykki allra íbúðareigenda. Afla skal samþykkis nýrra íbúðareigenda í húsum þar sem hundur er fyrir. Íbúðareigendur geta skriflega afturkallað samþykki sitt. Við afturköllun samþykkis, eða synjun nýrra íbúðareigenda skal heilbrigðiseftirlitið gefa hundaeiganda hæfilegan frest til að finnan hundinum annan samastað.
- h) Hundaeigendum ber auk þess að hlíta lögum og reglum er hundahald varða þ.á.m. reglum um árlega hreinsun hunda og greiðslu hundaskatts, svo og fyrirmælum er heilbrigðisnefnd setur.

- i) Eigendum hunda sem grunaðir eru um að vera smitberar, er skylt að hlíta því að hundar þeirra séu rannsakaðir, sé þess óskað af heilbrigðisfulltrúa, lækni eða dýralækni.
- j) Skráðum bændum er heimilt að halda einn hund án greiðslu, einnig er heimilt að halda viðurkennda veiðihunda án greiðslu, enda uppfylli þeir, að öðru leyti, öll ákvæði samþykktar þessarar svo sem um tryggingar- og hreinsunarskyldu.

3. gr.

Við brot á samþykkt þessari skal fjarlægja viðkomandi hund. Eiganda hundsins er skylt að leysa hann úr vörslu gegn greiðslu alls kostnaðar vegna brotsins, samkvæmt gjaldskrá sem staðfest er af heilbrigðismálaráðherra. Bæjarstjórn er heimilt að afturkalla viðkomandi undanþágu.

Sé hunds ekki vitjað innan tveggja daga frá því að eiganda var tilkynnt um handsömun hans, má aflífa hundinn, enda sé eiganda gert ljóst hvað vanræksla á að vitja hundsins getur haft í för með sér. Aldrei er skylt að geyma skráða hunda lengur en tíu daga frá handsömun. Heimilt er að aflífa hundinn að þeim tíma liðnum. Kostnaður greiðist af eiganda. Hættulega og óleyfilega hunda og þá hunda sem ganga lausir utan húss, skal handsama og færa í geymslu. Heimilt er að lóga hættulegum hundum þegar í stað af þar til kvöddum yfirvöldum.

Handsömun á óskráðum hundi skal auglýst tryggilega, t.d. í útvarpi eða blöðum. Sé hunds ekki vitjað innan tíu daga má aflífa hann. Komi síðar í ljós hver átti hundinn má krefja eiganda um greiðslu kostnaðar.

Bæjarstjórn er, hvenær sem er, heimilt að afturkalla leyfi fyrir einstökum hundum, eða öll leyfi telji hún þess þörf.

4. gr.

Umsókn um leyfi til hundahalds skal senda heilbrigðiseftirliti Norðurlands eystra, sem veitir leyfið, að fengnu samþykki bæjarstjórnar Húsavíkur.

5. gr.

Heilbrigðiseftirlit Norðurlands eystra annast eftirlit með hundahaldi í Húsavíkurbæ kaupstað samkvæmt samþykkt þessari, og getur leitað aðstoðar lögreglu yfirvalda þegar þörf krefur.

6. gr.

Brot gegn samþykkt þessari, eða reglum settum samkvæmt henni varða sektum, nema þyngri refsing liggi við að lögum. Með mál út af brotum á samþykkt þessari skal fara að hætti laga um meðferð opinberra mála og að öðru leyti í samræmi við ákvæði laga nr. 91/1988, VI. og VII. kafla.

7. gr.

Framangreind samþykkt bæjarstjórnar Húsavíkur staðfestist hér með skv. 22. gr. laga nr. 81/1988 um hollustuhætti og heilbrigðiseftirlit og 1. gr. laga nr. 7/1953 um hundahald og varnir gegn sullaveiki til þess að öðlast gildi við birtingu. Jafnframt fellur úr gildi samþykkt um hundahald í Húsavíkurbæ kaupstað nr. 244 frá 24. maí 1975.

Heilbrigðis- og tryggingamálaráðuneytið, 21. nóvember 1991.

Sighvatur Björgvinsson.

Ingimar Sigurðsson.